



Nivi Olsen  
Inatsisartunut ilaasortaq, Demokraatit

27-01-2017  
Sagsnr.  
Dok.nr. 4357590

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: iiknn@nanoq.gl  
www.nanoq.gl

## Inatsisartut suleriaasianni § 37 naapertorlugu apeqqummut nr. 025, kalaallisut ilinniartitaanerit pillugit akissut

Asasara Nivi Olsen,

Kalaallisut ilinniartitaanerit pillugit apeqqutinik arlalinnik nassiussaqaarsimavutit, uani ataani akissuteqarfisassannik.

**Apeqqut 1:** *Ilinniartitaanermut Naalakkersuisup arlaleriarluni oqaatiginikuuaa periarfissaasariaqartoq ilinniakkamik naammassinnissinnaanissaq soorlu Ilinniarfissuarmi, kalaallisuinnaq oqaaseqaraanni. Naalakkersuisoq qinnuigineqarpoq allattoqqullugit ilinniagassat kalaallisuinnaq naammassineqarsinnaasut.*

**Akissut:** Naalakkersuisooqatigiit isumaqatigiissutaanni imatut allassimasoqarpoq: "Kalaallisuinnaq oqaasillit ilinniarnissaminut periarfissaat annertusarneqassapput" Tamanna tunngavigalugu ilinniartitaanermut naalakkersuisutut pisussaavunga anguniagaq Naalakkersuisooqatigiinnermut isumaqatigiissut piviusunngortinniassallugu.

Ullumikkut nunatsinni ilinniarfiit assigiinngitsut aammalu Inuussutissarsiutinut ilinniarfiit arlaqartut maanna tamakkiisumik ilaannakuusumilluunniit kalaallisut ilinniartitsinermik ingerlavioereerput. Tamatumanilu soorunami piunasaqaataavoq suliani pineqartuni ilinniartitsisut kalaallisut danskisullu oqaaseqartuunissaat. Tamatumanilu aamma piunasaqaataavoq ilinniutinik oqaatsinut marlunnet atorsinnaasunik ineriartortitsisoqarsimanissaa.

Inuussutissarsiutilinnut aamma inuussutissarsiornermut ilinniarfiit arlaqartut aallartereersimapput fagini ilinniartitsiviusuni ilinniutinik atuakkanik nutserisarlutik, ilinniagaqartut danskisut piginnaaneqanngitsut aamma atuartitsinermi malinnaasinnaaqullugit ilinniakkaminnillu naammassinnissinnaaqullugit. Taakkua ilaattut eqqaaneqarsinnaapput KTI, Perorsaaneramik Ilinniarfik, Imarsiornermik Ilinniarfik Paamiut aamma Niuernermik Ilinniarfik Qaqortumi.

Taamaattoq siullertut pingaarnertullu tunngaviusumik ilinniartitaanerni kalaallisut oqaatsit ilinniartitsinermi atorneqartarput. Ilinniagaqartullu ataasiakkaat ilinniakkaminnik

ingerlatitseqqinniaangamik, assersuutigalugu ilinniakkami pingaarnermi, amerlasuutigut pisariaqartarpoq danskit oqaasiinik aamma / imaluunniit tuluit oqaasiinik piginnaasaqarnissaq.

Naalakkersuisut soqutigaat ilinniagaqartut oqaasiisa annertunerusumik ilinniartitaanerni atorineqarnissaat, tamanna anguneqarsinnaavoq kalaallisut oqaasillit ilinniarluarsimasut amerlanerusut pigilerutsigit aamma oqaatsitsinnik pingaarnertutisilernikkut.

Naalakkersuisut soqutigaat kalaallisuinnaq oqaatsit atorlugit ilinniarfiusinnaasut *qulaani taasamma saniatigut sapinngisamik amerlisaqqinnissaq.*

**Apeqquut 2:** *Naalakkersuisup qanoq iliortuni piviusunngortinniarpa, qulaani allatorneqartut ilinniakkat kalaallisuinnaq naammassineqarsinnaanissaat aamma taggeqquneqarpoq qanoq akeqarnissaat?*

**Akissut:** Meeqqat atuarianni atuartitsinermi oqaatsit atorineqartut tassaapput kalaallit oqaasii aamma danskit oqaasii. Ilinniarfissuarmi misilittangaareerpoq kalaallisuinnaq oqaasilinnik ilinniakkamik naammassinnittoqartarnera, periarfissaavorlu qinnuteqarnikkut nammineq oqaaserisat atorlugit soraarummeerutissatut allagaqarsinnaaneq misilitsissinnaanerlu. Taamaattoq sulii unammillernartoq uaniippoq sammisat allat danskisut tuluttullu sammisassanut ilaasut naammassineqartarnissaat. Naalakkersuisulli piumassuseqarput ilinniarfissuaq suleqatigalugu kalaallisuinnaq oqaasillit eqqarsaatigalugit periarfissap annertusarneqarnissaa.

Kalaallisut ilinniartitaanermik neqerooruteqarsinnaassagaanni fagitigut aamma perorsaanikkut pikkorissunik ilinniartitsisussaqaqtariaqarpoq. Ilinniartitsisunik kalaallisut oqaasilinnik ilinniakkaminnik naammassinnissimasunik atorfinitsitsisoqarsinnaavoq, kisiannili aamma toqqarneqarsinnaapput inunnik ilinniakkaminnik naammassinnissimanngitsunik, (imaappoq kandidatiunngitsunik), pineqartullu ilinniaqqinnissaa akilerlugu. Tamatumani Atorfiit marluk ukiumoortut pisariaqartinneqassapput, kandidatit ilinniarnissaq pineqarpat. Tamatumalu kingorna ilikkartitsisinnaanermut piginnaasanik ineriartortitsisoqassaaq, ukiumik ataatsimik sivisussusilimmi eqikkakkamik ingerlatsinikkut. Tamannalu isumaqarpoq atorfiit ukiumut pingasunoortut 1,3 mio. kr.-inik nalillit.

Ilikkartitsisinnaanermut ilinniarneq - didaktiske uddannelse – Kalaallit Nunaanni ingerlanneqarsinnaanngilaq, kisianni Naalakkersuisut piffissap ingerlanerani periarfissamik ammaaniarput, diplomertalimmik imaluunniit kandidatit ilinniarnermik ilikkartitsisinnaanermut ilinniakkamik danskisut ilinniakkami atortussalimmik. Taamatut ilinniaqqinneq ilimanarpoq atorfiit sisamat naligissagaat, 1,7 mio. kr.-inik naleqartumik.

Unammilligassarli annerpaaq tassaassaaq ilinniartitsinerup atortussat ullutsinnut naleqquttut atorlugit ingerlanneqarnissaa. Ilinniartitsinermi atortut ilisimatusarnikkut angusanut ineriartortuaannartunut malinnaasinnaasariaqarput. Kalaallit Nunaat sulii suliaasaqarfimmi tassani ilisimatusarnikkut tunniussisinnaanngilaq.

Kalaallimik ilisimatuumik ilinniartitsineq minnerpaamik ukiumik pingasunik sivisussuseqartarpoq, faginilu sammineqartussani tamani minnerpaamik ataaseq tunngaviussappat, tamanna minnerpaamik ukiumut atorfiit katillugit 18-it naligissavaat. Tamannalu taava 7,5 mio. kr.-it missaannik akeqassaaq.

Naatsorsuutigigaanni ilinniagaqartup ilinniartitsisunngorniarnermi quppernerit 60-it ECTS-

point-inut atortarai, bachelorinnngorniarluni ilinniartitaanermi quppernerit 14.500 -ingajaat pineqassapput, fagimut ataatsimut. Nutsernerinut 2,9 mio. kr.-it missaannik akeqassalluni. Fagillu 15-it missaanni toqqagassaanerisigut 43 mio. kr.-it missaat immikkoortittariaqassapput atortussanik nutserinernut, ullumikkut ilinniartitsisunngorniarnermi atorneqartartunut. Piffissamilu kingusinnerusumi ilisimatusaatinik nutaanik saqqummersitsisoqarpat, nutaamik nutserisitsinissaq *pisariaqalissalluni.*

**Apeqquut 3:** *Ilinniartitaanermut Naalakkersuisup arlaleriarluni oqaatiginikuuaa periarfissaasariaqartoq atuarfimmil ilinniaqqiffiit soorlu GU naammassineqarsinnaassasoq kalaallisuinnaq oqaaseqaraluaanniluunniit. Naalakkersuisup qanoq iliorluni qularnaarniarpaat takorluukkamut atuartitsissutissat ilinniartitsisullu pissarsiarineqarnissaat aamma taggeqquneqarpoq takorluukkapa piviusunngortinnissaata qanoq akeqarnissaa?*

**Akissut:** GUX-mik ingerlatsinermit inatsisit atuuttut naapertorlugit atuartitsineq misilitsittarnerlu GUX-mi oqaatsit arlallit atorlugit pisinnaavoq, tamatumani aamma kalaallisut, danskisut aamma tuluttut. Taamatut aaqjissuussinikkut GUX-imi ilinniagaqartut oqaatsitigut piginnaasassanik tuniorarneqartarput, ilinniakkaminnik ingerlatseqqinnissamut piareersaataasumik, oqaatsit arlallit atorlugit, maanna nunatsinni aamma nunarsuatsinni sumiiffinni allani.

GUX-ip oqaatsitigut piginnaasat kalaallisut, danskisut aamma tuluttut ineriartortinnerisa saniatigut, taava aamma sulissutigineqarpoq ilinniartitaanermi atortussani oqaatsinik arlalinnik piginnaaneqarnissap ineriartortinnissaa. Tamannalu pisinnaavoq atortussatigut assersuutigalugu kalaallisut aamma danskisut nassaassaasutigut, imaluunniit oqaatsinik assigiinngitsunik atuilluni nassuiaatitigut. Aamma sulissutigineqartut aappaattut oqaatsit imaalillugu ilinniartitsineq sapinngisamik naammassisaqarfiunerpaatillugu naak oqaatsit assigiinngitsut atorneqaraluartut. Kalaallisut aamma danskisut fagit atuartitaanerup 20 %-iani suleqatigiittarput, taamalu oqaatsit ataqatigiinnerat pilersinneqartarluni, tassuunalu aamma oqaatsitigut piginnaasat ineriartortinneqartarlutik. GUX-Nuuk assersuutigalugu eqqussinikuuvoq ilinniagaqartut tamarmik tuluttut minnerpaamik B-mi angusaqartarnissaannik. Tamannalu ilaatigut arlariinnik ilinniartitsisoqarluni ingerlatsisarnertigut pisariaqarfiini naammassineqartarpoq.

GUX -imi marlunnik oqaasilinnik ilinniartitsisut amerliartornerat atuuppoq, aammalu amerlasuutigut kandidatinut ilinniaqqinnissamut periarfissaqarfiusumik neqerooruteqartoqartarluni, inaarutaasunik fagitigut angusaqareersimannngitsunut. Taamaasilluni periarfissaqartitsisoqarpoq ilinniartitsisut ilinniaatigaluni atorfinni inissimasut fagitigut piginnaasassanik naammassinnikkiartuaartut Akademisk Diplomuuddannelsimik imaluunniit Masteruddannelsimik kalaallisut fagimi *tiguisinnaanerannut*

**Apeqquut 4:** *Taakku kalaalinnngorsaanissamut kissaatit ilinniartitaanermut Naalakkersuisumeersut maannakkullu ilinniartitaanermut pilersaarutit qanoq ataqatigiippat?*

**Akissut:** Naalakkersuisut naliliipput inuit piginnaasaat atorlugit siunissami nunatsinni imminut pilersorneq aqutissiuunneqassasoq. Kalaallit Nunaanni imminut napatittumi immikkoortoq pingaartoq tassaavoq ilinniartitaanermi iliuusissat, Naalakkersuisut ilinniartitaanermi iliuusissanut pilersaarutaannik kiisalu ilinniartitaanermut pilersaarut II-mik imaqartut.

Ilinniartitaanermi iliuusissanut pilersaarummi pingaarnertut anguniagaavoq ukioqatigiiaat 70 %-iisa 2015-imi meeqqat atuarianni naammassisut, inuusutissarsiutinut

ilinniartitaanermi ilinniakkamik naammassisaqarsimassasut 35-inik ukioqalinnginnerminni. Ilinniartitaanernut pilersaarut I-mi Ilinniartitaanerni iliuusissanut pilersaarummi anguniakkat aaqqissuussaasut tunngavigineqarput, ilinniakkanilu anguniagassat nalunaarsugaallutik ilinniagakkaartumik, iliuusissanik ilassutitaqartut, anguniakkat anguneqarnissaannut aqutissiuussisussaasunik.

Ilinniartitaanermut pilersaarut pilersaarutaanngilaq iliuusissanik tamakkiisunik imaqartoq, ukiut tulliuuttut 10-it iluanni naammassineqartussanik, kisiannili eqaatsumik aaqqissuussamik pilersaarut, ukiumoortumik malinnaatinneqartartoq. Tamanna kiffaanngissusiliivoq unammilligassat nutaat naapigiartarnissaannut, pilersaarutillu nalimmassartarnissaannut, pisariaqarfiisigut.

2015-imi inuusuttut 16-it aamma 18-it akornanni ukiullit ilinniartitaanerit avataanni inissisimasut (inuusuttuaqqat siunnerfiusutut taaneqartartut) 59 %-iupput. Siunnerfiusut taakkua ikinnerulersissagutsigit isumagissavarput ilinniartitaanernik aaqqissuussinitsinni kikkut tamarmik ilinniagaqarsinnaanissaat, - Naalackersuisooqatigiit kalaallisuinnaq oqaasilinnut ilinniarsinnaanissamik periarfissanik annertusaaniarnerat, oqaatsinik allanik ilinniarnissamut mattussinngilaq periarfissiillunili nunatsinni innuttaasut amerlanerusut ilinniarsinnaalernissaannut.

**Apeqqut 5:** *Taakku kalaalinngorsaanissamut kissaatit Ilinniartitaanermut Naalackersuisumeersut maannakkullu inuiaqatigiit ineriartornerannut qanoq ataqatigiippat eqqarsaatigalugit takornariaqarneq aamma aatsitassarsiorneq, taakkunanimi pisariaqarmat kalaallisuinnaanngitsaq aammali allamiut oqaasiinut piginnaaneqarnissaq atorfinissagaanni?*

**Akissut:** Inuusutissarsiutinut ilinniartitaanernut qinnuteqartut assersuutigalugu aatsitassarsiornermi imaluunniit takornariartitsinermi sulisuuniartut pisariaqartunik danskisut aamma tuluttut piginnaaneqartussaapput. Ilinniartitaanerillu ingerlaneranni ilinniartut aamma inuusutissarsiutinut pineqartunut siunnerfilikkamik danskisut aamma tuluttut ilinniartinneqartarput. Taamaattumik Naalackersuisut anguniagarinngilaat ilinniartitaanerit pineqartut taamaallaat kalaallisut ingerlanneqartarnissaat.

Inussiarnersumik inuulluaqqusillunga

Doris Jakobsen